

鮑夫人墓誌銘

十一郎可秀自撰

世之誌銘必假手於名公撰贊以大其譽聞以垂於不朽秀思誌之銘石者不過爲沒世之後恐遭亂遷亡識墓址銘此石以證之也竊此石藏土中卽有名公撰贊安得見之於人乎秀祖受周封於陳者 嬀滿也自陳遷齊者 完也自齊遷楚封潁川侯者 軫也自潁川郡遷吳興者 達也自吳興遷江州者 叔明也叔明卽宜都王乃南朝武帝之曾孫也江州卽今九江府德化縣白鶴鄉泉水壠自此遷居德安縣太平鄉者 旺也旺六世孫 崇與弟 端同居共食七百餘口 端公事唐

征伐有功封威烈將軍贈封先世遂以義聞僖宗旌表門閭昭
宗元年以義門旌之封 崇公爲江州長史贈光祿大夫宋太
宗 恩恤義門蠲免沿徵物色徭役又 勅本州貸粟以資乏
食眞宗又賜 御書誥封家長 勅建祠堂慶厯四年 詔端
公七世孫兢入朝 賜御雀醇酒嘉祐七年以義門丁繁奉
旨遣官分析各省府州縣共計二百九十一莊派定二百九十
一人拈鬮分析我 端公昔鎮潭州義門分析亦授是莊非先
祖之靈乎安得而怡分受之痛哉 先考團公任參將諡侯爵
八十二歲卒于京葬紫金山有像傳祀夫人之第九者卽秀母

也隨先考仕京餘夫人俱居義門分莊遂遷此里前者八母皆
亡今則秀母棄塵夫母也生長京都乃中書鮑寧公之長女年
登二十五始配 先考育秀一身母之操節松柏堅矢接下奉
上怡氣順旨四時祭祀之恭恪五服燕禔之饋餉未始一日而
亡多爲宗族所德訓厲諸子彌加勤篤男等先仕於外今皆歸
里朝夕溫清母益歡欣忽登仙境返駕瑤陵母壽七十四歲卒
卜地花果園男等拭淚作銘遺爲徵證

銘曰聰懿端慧婦道衷兮溫儉慈和家法隆兮訓導諸子母儀
崇兮壽考好德五福終兮花果之野遠山宮兮牛眠叶吉馬鬣

封兮九母塋地共一銘兮萬古不磨佑後昆兮謹銘